

08/10/1999

Buku 'Portrait of A Nation' dilancar

KUALA LUMPUR, Khamis - Orang ramai berpeluang memahami secara lebih menyeluruh prinsip dan perjuangan Datuk Seri Dr Mahathir Mohamad menerusi buku bertajuk 'Portrait Of A Nation'.

Buku terbitan Saron Corporation Sdn Bhd itu, mengandungi 23 puisi dalam bahasa Inggeris yang menceritakan kejayaan kepemimpinan Perdana Menteri dan keyakinan rakyat terhadap beliau.

Menteri di Jabatan Perdana Menteri, Datuk Tajol Rosli Ghazali, mewakili Timbalan Perdana Menteri, Datuk Seri Abdullah Ahmad Badawi, merasmikan pelancaran buku itu di sini, hari ini.

Tajol berkata, buku itu boleh menjadi panduan berguna kepada generasi sekarang dan akan datang mengenai sumbangan besar Dr Mahathir membangunkan negara dan menjulang nama negara di arena antarabangsa.

"Ada penulis tempatan dan luar yang menghasilkan penulisan termasuk berbentuk autobiografi mengenai sejarah hidup dan kejayaan Dr Mahathir. Penulisan itu tentu berguna sebagai rujukan sejarah Dr Mahathir dan gaya kepemimpinannya.

"Beliau juga berjaya meletakkan nama Malaysia sebaris dengan negara maju bukan saja dari segi politik dan ekonomi malah dalam bidang sukan.

"Dengan semangat Malaysia Boleh, rakyat berjaya mencapai kecemerlangan pada peringkat antarabangsa," katanya.

Buku itu diterbitkan hasil usaha Ketua Pegawai Eksekutif Saron, Datuk Sri Ram Sharma. Ia berharga RM25.90 bagi naskhah biasa dan RM39.90 bagi naskhah kulit keras.

(END)